

INUIT ATAQATIGIIT

INATSISARTUNI



21. august 2014

UKA 2014/158

Inatsisartut suleriaasianni § 36 naapertorlugu apequteqaat tunngavigalugu oqallinnissamik imaattumik siunnersuuteqarpunga:

Aalisarnerup nutarterniarneqarnera qanoq naammassiniarneqarnerasoq pillugu apequteqaat aallaavigalugu oqallisissiaq.
(Inatsisartunut ilaasortaq Ane Hansen, Inuit Ataqatigiit)

Tunngavilersuut:

2002-mi Inatsisartunut ilaasortanngorpunga aalisarnermut inatsisip nutarterneqarnissaa kissaatigineqarluni Inatsisartuni oqallisigineqartoq, ukiullu ingerlanerini Inatsisartuni ilaasortat arlallit nutarterinissamik siunertaqarlutik qulaajaanissamik assigiingitsunik siunnersuuteqartarsimapput. Tamatumalu kinguneranik aalisarnermi atukkat pillugit nalunaarusiat ikigisassaanngitsut saqqummiunneqartarput aalisarnermik soqutigisaqartut kattuffiit qanimut suleqatigalugit suliarineqartarlutik.

2007-mi Aalisarnermut Naalakkersuisuusup aalisarnermi inatsisissaq ataatsikkut suliareqqullugu saqqummiukkalarpa Inatsisartunilu tamarmiusunit piumasarineqartoq malillugu suliaq kinguartinneqarpoq aalisarnermi atukkat pillugit qulaajaasussamik ataatsimiisitaliarsuarmik pilersitsisoqarnissaa kissaatigineqarluni.

Aalisarnermut Ataatsimiisitaliasuup aalisarnermik soqutigisaqartunik kattuffinnik attuumassuteqartunik, aningaasaqarnikkut allaffissornikkullu immikkut ilisimasilinnik inuttaqartinneqartup suliani naammassivaa peqataasunit ataatsimorfineqartutut saqqummiunneqartoq.

Inassuteqaatit aallaavigalugit aalisarnermut inatsissatut siunnersuutip immikkortua alloriarneq siullertut taaneqartoq 2011-mi Naalakkersuisunik saqqummiunneqarpoq Inatsisartunilu amerlanerussuteqartunit tunuliaqutserneqarluni naammassineqarpoq. Siunertarineqarluni alloriarnerup aappaa apeqqutinik makkuninnga isumersorfiussasoq inaarutaasussarlu tullertut saqqummiunneqarumaartoq:

1. Raajarniarnermi kinguaariit nikinnissaannut ajornartorsiuteqarneq.
2. Nunat allamiut piginnittuusinnaanerannut tunngasut.
3. Tulaassisussaataaneq.
4. Pisuussutitik atuinermut ernianut tunngasut.
5. Sinerissamut qanittumi aalisarnernerup avataanilu aalisarnernerup immikkoortinneqarnera.
6. Pisassiissutitik pigisat atorunnaarsinneqarsinnaaneranni piffissarititaasoq.

Mannalu tikillugu inatsisissap immikkortuata aappaa suli saqqummiunneqangilaq. Aalisarnermut Ataatsimiisitaliasuup inassuteqaatai malillugit suliaq suliarineqartussatut siunniussaammat mannaluk tikillugu allatut ittumik inaarutissamik saqqummiussisoqarsimanngimmat, apequteqaat aallaavigalugu oqallisissiaq manna aqutugalugu Inatsisartuni ilaasortat qanoq inaarutaasussamik siuner-

taqarnersut paasiniaavugut, aalisarnermi inuutissarsiuqartut kisiisa pinnagit apeqqut inuiaqatigiit aningaasarsiornikkut siuariartortumik ingerlaqqinnissaannut inatsisip inaarneqarnissaa pisariaqarluinnarmat.

Manna tikillugu aalisarnermik inuutissarsiuqartuunerput aningaasaqarnikkut isaatitsissutitsinni pingarneraavoq sulilu ukiorpassuit tulliuttut taamaattuassalluni. Piffisami kingullermi Naalakkersuisunit nassuerutigineqarpoq aningaasarsiornikkut isaatitsissutigisassatut isumalluutigilluagarput aatsisassarsiorneq uuliasiornerlu ukiuni qaninnerpaani ilimasaarutigineqarsimasutuut malunnaatilimmik isaatitsisutaanaviangitsoq. Taamammat aalisarnermi isumalluutit annertunerpaamik inuiaqatigiinni isumalluutigineqarnerisa qaffassarnissaanut inatsisip nutarterneqarluni aallartereernikup peqqissaarussamik inaarneqarnissaa isumagisassatta pingaarnertit ilagaat.

Tamatuma saniatigut oqaatigissavara allatigut suliat aallartinneqarsimasut inaarneqarnissaat pingartilluinnaratsigu, tassalu piujuannartitsinissaq nungusaataannngitsumillu aalisarnermi raajarniarnermilu aalisakkanillu assigiingitsunik aqutsinerup ersarissarneqartariaqarnerat malittarisassaliornerallu, maannalu nunarsuarmioqatigiit akornanni niuvernerni pisisartuniillu pingaartinneqartut tunaartaralugit inerisaajuarnissap ingerlatinneqartuarnissaa.

Aalisarneq isumalluutitsinni suli pingaarnersaammat aalisarnermi inatsisip peqqisaartumik inaarneqarnissaa tamatta pisussaaffigarput, unalu apeqquteqaat aallaavigalugu inaarutaasussatut isumaliutisi oqalliseqataaffiginissaat qilanaarput.